

汾陽縣志

卷之八

列女

列女

張崑起妻失姓氏崑起爲國子助教免歸盜陷汾州與大並赴井死

右金一人

姜鳳舉妻皇甫氏夫歿或勸之再適泣曰禽獸且有不
再配者人可反不如乎況舅姑老子幼何忍棄之奉定
中詔旌

右元一人

郭世玉妻陳氏年二十一夫歿子纔一齡事舅姑撫稚
子貞心苦節兩遇兵燹踰九十乃卒洪武中詔旌

劉景博妻矯氏夫歿五十年人未嘗見其貌有一子雲漢紡績以養雲漢後官甯夏訓導宏治中詔旌

舉人常祐妻謝氏夫卒於京家貧舅姑老子纔一齡謝盡孝道知州曹寵陳秉忠相繼牒於巡按額獎之

鎮國中尉朱知熈妻賀氏封恭人見中尉病不起欲先死以殉遂絕飲食與知熈同日卒時嘉靖二十七年慶成王表樂爲奏聞禮官按典無旌命婦例世宗特命旌之諡曰貞烈

鎮國將軍朱奇漆妻王氏少寡奉姑稱孝年八十餘其子輔國將軍表杞以狀聞嘉靖三十九年賜勅遣行人

梅惟和詣第旌獎

韓秀妻謝氏夫歿年十七守志節隆慶初知州齊宗堯額表之

王蜀妻侯氏年二十一夫歿卽欲從之死家人防守潛吞毒同日卒按院奏請勅旌

鎮國將軍朱敏濬妻賈氏年二十五夫歿矢志從死衆慰止之不百日哀毀死巡撫按院俱額表之

張大化妻原氏年二十二夫歿事繼姑盡婦禮苦節撫孤巡撫按院額表之

田贈妻武氏年十七夫歿紡績撫孤苦節四十餘年巡

按額表其門

生員賈庠妻王氏夫歿自經死學道南居益額表之
生員賀時泰妻賈氏夫歿至貧事姑孝年饑自食糠教
子讀書苦節三十餘年卒於崇正之季未舉曾孫德
藩康熙己卯舉人

田伯松妻朱氏伯松歿舅姑亦相繼歿伯松有幼弟甫
生數月朱撫之長爲娶婦尋夫婦皆卒遺子芳朱育爲
已嗣教讀書爲庠生巡撫額其門曰一世維風歲給穀
二石布一匹

慶成王審瞋妃武氏崇正癸未冬李白成渡河掠蒲坂

妃聞之不復櫛沐宮媼以問妃曰天之所壞人不能支
我待死而已旣而賊至將入府妃赴井死十閱月屍始
得出之面如生

李茂財妻劉氏隨夫避賊崖窟賊索得之茂財見殺劉
枕夫屍大哭賊擁上馬投地罵賊所脅諸婦羅勸罵益
甚賊怒舉刀斫之三以死

朱新堞妻盧氏妾薛氏馮氏新堞晉恭王十七世孫也
家汾州崇正十四年知中部縣會賊入關傳檄至新堞
方巡城怒而碎之誓必死以守妻妾三人請先自經有
女方數歲亦隨母死

李桂妻蘇氏

千戶謝德妻王氏

田訥妻郭氏

劉鎧妻段氏

樊鶴妻任氏

常保妻田氏 以上俱以節孝詔旌

生員田一蘭妻張氏

李金榮妻吳氏

蔚大賢妻郭氏 以上並守志節

右明二十七人

生員張君遴妻朱氏年二十四夫歿矢志撫孤康熙十六年旌

李之桂妻田氏年二十三夫歿子緒甫生事舅姑以孝聞撫子成立苦節三十餘年康熙四十九年旌

杜根芽妻李氏貧家婦也夏月采蕨有李大成者先在山招之曰是處可取也指引入深林欲犯以非禮李不從擊殺之棄溝中鄰人雷姓名打差兒見李入山久不出跡求之大成遇打差兒狀甚倉皇打差兒歸語根芽得李屍訟之官治大成死罪康熙四十九年旌

雷龍騰妻齊氏龍騰早歿值收穫晨起詣場圃趙之福

欲犯以非禮齊急持挺格鬪之福擊以石傷而仆地奮力起之福投石亂擊罵不絕聲以死事旋敗露治之福死罪康熙五十五年旌

監生韓衍萃之母年十八夫歿矢志撫孤康熙六十一年額表其門

侯孝女字秀姑侯明亮之女也康熙六十一年饑母呂氏以食盡將赴井女號泣隨其後挽救不及亦投井死時年十四縣人名其井爲孝女井

監生張寅鎧妻李氏年二十五夫歿時舅姑已先歿有祖姑年踰七十李曲盡孝事守志撫孤壽八十而終康

熙中知縣平士楨額表之

史廉妻崔氏廉客死宣府計聞崔拮据爲歸其柩旣至
曰吾之事畢矣卽於是夕自經

任顯烈妻姜氏年十八夫歿無子繼子克任撫之長克
任中雍正己酉武舉

常懋文妻王氏年十九夫歿守節撫孤有司額表之

董科妻高氏年二十五方娠而夫歿子生撫之守志姜
壤之變避難肅靜村小竇溝中遊騎數輩蹤迹得之罵
賊被殺雍正七年旌

王永興妻劉氏夫歿子纔二齡事姑撫幼雍正中知府

白映棠額表其門曰苦節可風壽八十一終

生員田錫蘭妻劉氏事舅姑盡婦職姑病曰婦事我甚孝願婦他年娶媳亦如婦之賢及舅姑相繼歿夫感疾經歲旣而知病不可爲謂劉曰汝年少無以我故自苦劉愀然曰是何言也因拔笄折之爲誓錫蘭默然一日告其父劉涵曰夫病劇而無子且有他命計決一死以從父急止之慰以立嗣稱未亡人對曰立嗣之事在父與田宗共圖之不繫兒之有否也月餘夫歿劉檢視衾衾畢值舉家倉皇扃戶自經死年二十三

王邦妻侯氏年二十四夫歿子生纔一月矢志守貞孝

事舅姑姑歿舅娶繼姑事之如一旣而舅姑相繼歿有幼子在襁褓俟紡織以供衣食小叔與己子皆撫鞠成立乾隆十二年旌

呂君用妻于氏年二十五夫歿子琛生纔一月守志撫孤及琛長爲諸生雍正中知府劉登庸額表其門曰矢節垂慈

貢生呂文彬妻魏氏子審裕生未踰年夫隨兄文櫻在京邸旣而訃至魏恐舅姑之老而哀傷也曲盡婦職撫遺孤父魏好修以貢生援例授博士未之任卒子幼乃以弟與己子同延師訓教乾隆二十二年壽七十知府

顧鴻額表之曰荻德松年至七十九而終進士賈天祿
爲作傳

王清應妻汪氏孝事繼姑夫客死遺孤嘉祚尚幼撫之
長爲諸生乾隆二十年知府顧鴻爲碑文表其墓

李承謨妻張氏年二十六夫歿一子三齡一子纔一齡
家貧姑老上事下鞠績紡度日苦節四十餘年

王信妻朱氏夫歿無子撫繼子家輔紡績以給苦節四
十餘年

馬雲錦妻王氏夫歿遺孤三日遷曰迅曰遼撫之長遷
歲貢生遂拔貢壽七十得題旌

生員王邦謙妻田氏子生纔一月而夫歿事舅姑盡婦職撫孤守志三十餘年得題旌

樊之璞妻任氏年二十三夫歿子纔七齡事姑撫幼以貞孝稱得題旌

馮開元妻姚氏夫歿姑老奉事稱孝守節撫孤壽至七十得題旌

李節森妻劉氏夫歿無子撫繼子成立得題旌

賈生珮妻郝氏年二十四夫歿遺孤二鎮釧撫之長皆爲諸生得題旌

監生趙伸繼室李氏夫歿撫孤得題旌

張世琅妻田氏夫歿遺孤二述宰述相撫之長皆爲諸
生得題 旌

馬文元妻王氏夫歿撫孤又早歿繼孫撫鞠守節五十
餘年得題 旌

賈生姜之棟妻郝氏年二十夫歿子思憲尙在襁褓撫
之長爲諸生守節四十餘年得題 旌

賈三聘妻馮氏夫歿子烈生纔一月守志撫孤壽百有
一歲後烈之子連璋婦王氏孝事祖姑壽亦至八十七
歲

趙登第妻李氏年二十六夫歿撫孤家事不聽夫之兄

弟掌理尋亦中落絕不以爲言守節三十餘年

呂心仁妻卞氏年二十夫歿子尙在襁褓矢志守貞撫之成立事祖姑孝及歿卞以哀毀致疾

監生任大任妻郝氏年十八夫歿守志三十餘年

曹文奎妻王氏方娠而夫歿後三月子生撫之成立守節五十五年

郭得貴妻惠氏年二十九夫歿遺孤三人俱幼又甚貧日夜織紡三子皆自課讀苦節三十七年

張萬清妻王氏年十九夫歿守志撫孤四十餘年

張大璵妻劉氏成婚禮之日值大璵患鉅瘡垂危入門

卽侍湯藥未一月夫歿彌留之際執手謂之曰悞爾青
年願早適人答曰劉門無再醮婦何多慮爲旣而繼姑
遣之嫁其母繼母也亦欲奪其志不從含怒待之姑不
與共食劉食人所不堪食事姑彌孝謹有祖姑年七十
餘多病劉遂同房侍寢稍聞呻吟聲輒終夜不寐祖姑
感其孝至諱言病久之家人內外咸以劉異尋常且言
動必合禮法鄉里相與語及劉則指稱之曰聖賢劉幼
時悅論語孟子等書繼子爲夫後自教之

張瑾妻席氏夫歿撫孤士傑士英鍼蒔自給壽九十一
歲孫熾中乾隆乙酉舉人